

LINO GONZÁLEZ-DOPESO

"É preferíbel investir na mellora da actual rede de abastecemento e no saneamento integral do Miño"

Lino González-Dopeso é concelleiro con José López Orozco desde as eleccións municipais de maio do 2003. Médico de profesión e moi querido polos seus pacientes, pola súa cordial e minuciosa maneira de practicar a medicina, mantén a súa afición polas motos e unha peculiar imaxe, semellante á dun mariñeiro, que o afasta do prototipo habitual de político. Segundo afirma, a súa preocupación polo medio ambiente só se ve superada polo espírito solidario, o que o leva a substituír as vacacións por traballo voluntario en países en vías de desenvolvemento. Como Concelleiro de Medio Ambiente, propúxose tres obxectivos principais para Lugo: "mellorar a calidade da auga potábel, mellorar o contorno da Muralla e as zonas verdes, e conseguir unha cidade máis limpa".

- O Concello de Lugo rexeita o proxecto de abastecemento de auga do río Narla. ¿Que pasos vai dar respecto desta discrepancia coa Confederación Hidrográfica e a Deputación Provincial?

- Polo de agora, imos agardar por unha decisión do Ministerio de Medio Ambiente. O Concello en ningún momento foi informado convenientemente sobre este proxecto, que inclúe a construción dun encoro no río Narla e que precisa dun investimento superior aos 33 millóns de euros. Nós pensamos que este orzamento estaría mellor investido na mellora da actual rede de abastecemento e no saneamento integral do Miño, porque as análises demostran que a auga do Narla presenta os mesmos niveis de calidade que a do Miño, demostran que non é mellor. Por iso escribimos hai meses unha carta á Confederación Hidrográfica na que lle facíamos esta proposta.

- Puxo en marcha a recollida selectiva de pilas. ¿A poboación é receptiva?

- A verdade é que está a funcionar moi ben. Esta campaña de recollida faise en colaboración coa Asociación Española de Recuperadores de Pilas e Acumuladores (AERPA). Puxémola en marcha a finais do ano pasado, para o que se instalaron 21 colectores de pilas en distintos puntos da cidade. Un mes despois de colocalos xa estaban cheos.

- ¿Cómo vai incentivar a recollida selectiva de residuos sólidos?

- O ano pasado fixemos un estudo para avaliar a disposición da industria e do comercio para colaborar na recollida selectiva de residuos. En principio a resposta foi positiva. De feito, neste momento estase a desenvolver unha serie de xuntanzas informativas para explicar o proceso e incrementar a concienciación cidadá.


- E o proxecto de compostaxe, ¿en que fase se atopa?

- Neste momento hai un recurso dunha das empresas que se presentou ó concurso de adxudicación, que é un recurso extraordinario de revisión, onde manifesta que houbo erros de feito no momento de valorar a adxudicación.

A Corporación Municipal ten que decidir se admite ou non este recurso. Se non o admite, seguiría sendo a mesma adxudicataria, entón poríase en marcha automaticamente o proceso de construción da planta. Se o admite, teoricamente tería que reunirse novamente a mesa de contratación, volver puntuar e, despois, teríamos unha nova ou a mesma empresa adxudicataria.

- A mellora das zonas verdes é unha das súas prioridades. ¿Que se fixo ata o de agora?

- Fixemos un novo xardín na Avenida da Coruña, instalouse rego por aspersión en distintas zonas verdes, entre as que están as medianas da Ronda do Carme e de Fingoi, e mellorouse o coitado xeral de todos os xardíns da cidade. Ademais, o Concello iniciou este ano o mantemento das zonas verdes do polígono industrial do Ceao, onde se están a



arranxar as rotondas. Estamos agardando a recibir a obra do Parque Marcos Cela, onde pensamos instalar unha pasarela. Tamén temos a intención de facer un xardín en Entre Carrís.

- ¿Que lle gustaría que lembrasen do seu labor no concello?

- O mellor que lle pode pasar a calquera é que ninguén se dea conta de que está, pero que, cando marche, o boten de menos. Eu teño un lema: chegar en silencio e saír sen facer ruído... (rise). A miña intención é mellorar a calidade da auga e sanear o Miño, mellorar o contorno da Muralla e a limpeza da cidade.

